


Tertib Surah	Nama Surah	Bilangan Ayat	Bilangan Ruku'	Makkiyyah / Madaniyyah	Tertib Turun	Bilangan Paragraf
Ke-53	An-Najm	62	3	Makkiyyah	Ke-23	5



Zaman Diturunkan

1. Bahagian pertama surah terdiri daripada 18 ayat, besar sekali kemungkinannya turun ketika berlaku peristiwa Mi'raj iaitu pada bulan Rejab tahun ke-12 Kenabian.
2. Bahagian kedua surah bermula daripada ayat 19 hingga 62 diturunkan selepas berlakunya hijrah ke Habsyah sekitar tahun ke-5 Kenabian. Umaiyah bin Khalaf, ketika mendengar ayat terakhir surah ini tidak seperti orang-orang lain yang semuanya bersujud, dia sebaliknya hanya mengambil sedikit tanah dan menyapunya di dahi sahaja.

Kelebihan Surah An-Najm

'Abdullah bin Mas'ud berkata, **أَوَّلُ سُورَةٍ أُنْزِلَتْ فِيهَا سَجْدَةٌ وَالنَّجْمُ قَالَ فَسَجَدَ رَسُولُ اللَّهِ صَلَّى اللَّهُ عَلَيْهِ وَسَلَّمَ وَسَجَدَ مَنْ خَلْفَهُ إِلَّا** Bermaksud: “Surah yang mula-mula diturunkan yang ada di dalamnya ayat sajdah ialah **وَالنَّجْمُ**.” Kata beliau: “Maka Rasulullah s.a.w. bersujud dan bersujudlah juga orang-orang yang berada di belakangnya kecuali seorang lelaki, aku melihatnya mengambil segenggam tanah lalu bersujud di atasnya, aku melihat dia kemudiannya terbunuh sebagai seorang kafir, dia adalah Umaiyah bin Khalaf.” Shahih Bukhari, Kitab Tafsir, Bab Tafsir Surah an-Najm, hadits 4,582 daripada Ibnu Mas'ud.

Hadits ini menunjukkan surah pertama menurut tertib nuzuli yang terdapat di dalamnya ayat as-sajdah ialah Surah an-Najm.

Perkaitan Surah An-Najm Dengan Surah Sebelum Dan Selepasnya

1. Di dalam 3 surah sebelum ini iaitu Surah Qaf, az-Dzariyat dan at-Thur, terdapat bermacam-macam dalil membuktikan kebenaran adanya hari akhirat. Di dalam Surah an-Najm ini pula dinyatakan bahawa keselamatan di akhirat terletak hanya pada aqidah tauhid dan amal shaleh, oleh itu manusia tidak seharusnya bergantung kepada syafa'at para malaikat dan juga orang-orang shaleh.
2. Di dalam Surah at-Thur Kitab Taurat disebut sebagai **كِتَابَ مَسْطُورٍ**, di dalam Surah an-Najm ini pula ia disebut sebagai **صَحْفِ مُوسَى**, sebahagian daripada ajarannya terdapat di dalam surah ini.

Beberapa Kata Kunci Dan Tema Utama Surah

1. Melalui firman Allah (Ayat: 3-4):

وَمَا يَنْطِقُ عَنِ الْهَوَىٰ ۚ إِنْ هُوَ إِلَّا وَحْيٌ يُوحَىٰ ۚ

Dijelaskan bahawa Rasulullah bukan seorang ahli fikir atau failasuf yang bercakap hanya berdasarkan renungan dan pemikiran serta lintasan-lintasan jiwanya, malah beliau mengikuti wahyu yang diturunkan kepadanya.

2. Daripada firman Allah (Ayat: 18):

لَقَدْ رَأَى مِنْ آيَاتِ رَبِّهِ الْكُبْرَى ﴿١٨﴾

Dapat diketahui bahawa pada malam Mi`raj, Nabi s.a.w. tidak melihat Allah, sebaliknya apa yang dilihat Baginda hanyalah tanda-tanda besar kekuasaan Allah.

3. Firman Allah (Ayat: 21):

أَلَكُمُ الذَّكْرُ وَلَهُ الْأُنثَى ﴿٢١﴾

Dikemukakan dalam bentuk soalan, aqidah ciptaan orang-orang Quraish bahawa para malaikat adalah anak-anak perempuan Allah dipukul dengan teruk. Ini kerana mereka sendiri menanam hidup-hidup anak-anak perempuan, kemudian berasaskan sangkaan dan agak-agakan semata-mata mereka mengatakan malaikat adalah anak-anak perempuan Allah.

4. Perkataan ظَنَّ di dalam ayat ke-23 dan ke-28 menjelaskan kepercayaan orang-orang musyrikin adalah karut dan tidak benar kerana ia berasaskan sangkaan dan agak-agakan semata-mata, sedangkan sangkaan tidak berguna sama sekali dalam menegakkan kebenaran.

5. Firman Allah (Ayat: 26):

لَا تُغْنِي عَنْهُمْ شَيْئًا

Menunjukkan kepercayaan orang-orang musyrikin tentang para malaikat dapat memberi syafa'at juga karut. Firman Allah ini jelas menunjukkan syafa'at para malaikat tidak berguna sama sekali kepada mereka.

6. Melalui firman Allah (Ayat: 24):

أَمْ لِلْإِنْسَانِ مَا تَمَنَّى ﴿٢٤﴾

24. Adakah manusia akan dapat mencapai segala yang dicita-citakannya? (Tidak!).

Ia menunjukkan bahawa kejayaan di akhirat tidak mengikut kehendak manusia, bahkan kejayaan akhirat itu akan diperolehi sesuai dengan usaha yang dilakukan manusia di dunia, (Ayat: 39):

وَأَنْ لَّيْسَ لِلْإِنْسَانِ إِلَّا مَا سَعَى ﴿٣٩﴾

39. Dan bahawa sesungguhnya tidak ada (balasan) bagi seseorang melainkan (balasan bagi) apa yang diusahakannya;

7. Firman Allah (Ayat: 34):

وَأَعْطَى قَلِيلًا وَأَكْثَى ﴿٣٤﴾

34. Dan setelah ia memberi sedikit pemberiannya, ia memutuskannya (kerana menurut hawa nafsunya)? Ayat ini diturunkan berkenaan Walid bin 'Uqbah, ada seseorang meminta duit darinya dan berkata: "Kalau engkau akan diazab di akhirat nanti, aku akan menanggung azab itu sebagai gantimu", maka dia memberi sedikit duit kepada orang itu dan terus berhenti, lalu dikatakan kepadanya bahawa amalan setiap manusia itu sendiri berguna atau tidak berguna kepadanya.*

8. Firman Allah (Ayat: 60-61):

وَتَضْحَكُونَ وَلَا تَبْكُونَ ﴿٦٠﴾ وَأَنْتُمْ سَمِيدُونَ ﴿٦١﴾

60. Serta kamu tertawa (mengejek-ejeknya), dan kamu tidak mahu menangis (menyesali kesalahan kamu serta takutkan balasan buruk yang akan menimpa kamu)?

61. Sedang kamu adalah orang-orang yang sombong angkuh, lagi yang melalaikan kewajipan?

Dua ayat ini ditujukan kepada pemimpin-pemimpin Quraisy yang menghadapi al-Qur'an dengan sikap mereka yang tidak serius, sebaliknya dengan memperolok-olok dan dan bernyanyi, mereka sepatutnya tidak menolak dalil-dalil al-Qur'an yang kuat itu dengan mempermain-mainkannya kerana al-Qur'an adalah kalam yang serius, ia perlu direnungi dan difikir dengan baik.